

四庫全書

史部

欽定四庫全書

史部

山西通志卷八十八

詳校官監察御史_臣查善長

檢討_臣德生覆勘

總校官進士_臣朱 鈐

校對官修撰_臣吳錫齡

謄錄監生_臣王元愷

欽定四庫全書

山西通志卷八十八

名宦

六

太原府

明

謝忠上虞人洪武初任太谷縣主簿以文學政事著稱
承谷容武進人洪武初任交城縣丞勸課農桑平徭薄
賦陞兗州府同知

杜斌洪武初任嵐縣以廉能著績民傳頌之

楊榮祖寶應人洪武初任交城課農桑均徭役後以憂去民思慕之

潘原英山東歷城人洪武初任太原縣知縣改築城池重葺廟學雅善課士當兵戈凋殘之際興賢育才絃誦不輟祀名宦

尹暹安豐人洪武初任興縣政平訟簡賦役均平陞知遼州民思其惠立善政碑後遷平陽府同知

韓文寶洪武二年任徐溝縣知縣措置有方公廨學校
壇壝驛傳以次修舉祀名宦

胡維賢直隸定遠縣人洪武五年以平陽府同知陞太
原知府清謹端正剔蠹蒐弊解紛決壅談笑處之創
修太原府治見葉砥碑記

姚翥直隸永平人洪武三十年任榆次縣知縣公廉謹
恪莅政有為民懷其惠擢知府祀名宦

王天爵南部人洪武間以賢良舉知太原府直諒不欺

當初赴召時太祖問所讀經以書對因試欽若昊天
文稱旨問治州縣如何對曰首在得民心民心既得
則州縣事治矣又問以知府對曰當戒左右無為州
縣擾則府事治矣既又問以布政使對曰是則臣見
所未及也太祖歎息稱善遂以太原命之居官有治
績

劉觀直隸保定人洪武間以進士任太谷縣知縣善催
科不事敲扑而輸將競勸聽訟能得情政事之暇督

諸生讀書親為講授以考績去行李蕭然擢監察御史累官布政司參政祀名宦

施文學洪武間任奇嵐知州時奇嵐遺黎僅存文學撫綏有法民獲復蘇乃按古酌今於有關治化者悉力修舉祀名宦

黃福字如錫山東萊州府昌邑縣人洪武間由鄉貢初授項城縣簿改清源清廉仁愛民無不懷以憂去後陞京衛知事尋陞經歷上書論國大計太祖奇之陞

工部右侍郎成祖朝遷左陞尚書改刑部撫綏交趾
幾二十年交人戴之如父母仁宗朝召還交人號泣
不舍福既還交寇黎利乃叛命將討之福偕行戰失
利福為寇得皆下馬拜禮送北歸拜戶部尚書尋轉
南京吏部正統初進少保福始終以國家生民為念
卒年七十有八贈太保諡忠宣

宋虹唐縣人洪武中以人材任祁縣廉慎有為以才行
超卓遷御史終知府

陳章應晉江人洪武中進士榆次縣丞調安邱藩憲考其學優廉幹以狀聞特降旌榜嘉之終禮部主事

馬謙順德人洪武間交城縣丞興學勸農政績甚著陞戶部主事

陳棟儀封人洪武間任文水崇尚文學以禮導民

張羽陝西武功人舉人洪武三十四年任文水令建治解學邑有稱十虎三彪一太歲者悉按法徙之時以為能

郝瑾邯鄲人永樂中任太原縣有惠政滿去人多思慕之

汪添昂麻城人永樂間任祁縣以循良著績

崔忠唐縣人永樂間嵐縣典史在任九載廉聲大播

蘭從善河南磁州人永樂間任太原縣儒學教諭博學

工文造士寬嚴有方退仍手一卷諷詠後累官翰林

學士

劉俊直隸淮安人永樂間任榆次縣知縣器宇軒豁遇

事周詳慎重措置得宜未浹期頌聲丕作祀名宦

范宣河南歸德人永樂十三年任榆次縣訓導遽於問學章采蔚然言動有則諸生奉為模楷祀名宦

楊春汶上人宣德間任文水政尚簡易時稱為良牧

孫慶安定州人宣德間任興縣多所營繕不取於民後陞監察御史

周禮任邱人正統間祁縣丞學問該博造士綏民

郝鳳直隸人正統十三年任嵐縣令修城捍民設阱禦

虜

劉純山東歷城縣人正統十年任嵐縣令剛直不阿人皆稱頌

王璉咸陽人正統間任嵐縣以廉能稱

張瓚字宗器孝感人正統十三年進士知太原府有善政後巡撫四川移總督漕運卒

劉文莊直隸正定人正統間任太原府知府習吏事知民隱興舉悉當聽訟明敏祀名宦

劉因鹽城人正統初以布政使檢校擢陽曲縣知縣能以廉自守涖政明敏無留牘累官應天府治中祀名宦

劉敏直隸大興人正統間以舉人任太原縣知縣修葺城垣濬鑿濠塹練習吏事行寬於嚴擢太原府同知祀名宦

滕淵祥符人正統間任嵐縣典史有廉能聲當道皆重其材嘗承檄率民兵戍偏頭關秩滿去行李蕭然祀

名宦

王恭直隸晉州人景泰三年以舉人任榆次縣訓導性恭謹與諸生講解日夕不倦聞者豁然祀名宦

劉震字伯威河南洛陽人景泰七年任榆次縣知縣撫民以恩尤慎於刑獄而豪強讐服盜賊自化祀名宦
黨忠字行恕陝西富平人景泰間以舉人任榆次縣教諭嚴重有師範勤於作人所列科條詳明簡要在白鹿鵞湖之間祀名宦

李維新陝西狄道人景泰七年以監生任徐溝縣知縣
政以振飭為先涖任九年擢中城指揮祀名宦

張玘直隸霸州人景泰間以監生知清源縣重學惠民
後陞霍州知州祀名宦

高安河南睢州人景泰間以進士任文水縣知縣揮霍
有長材處煩劇裁決裕如施為有次第嘗修縣解開
渠水迄成功不用民間一錢擢監察御史祀名宦

成憲字伯度山東新泰人天順元年以舉人任榆次縣

訓導博極羣書於易尤邃善化導經指授者悉有成
就祀名宦

宋賓中部舉人天順間任陽曲簿詢民隱抑制豪強陞
陝州知州

王孚延津人天順間任祁縣牧民有方既去人思之
孫緝豐城進士天順間任嵐縣剛毅不苟決斷如流吏
畏其明訟願其愬重修文廟陞監察御史

王準陝西神木人天順間任嵐縣知縣清廉勤慎嘗修

學宮翊文教士風丕變祀名宦

陳鑑臨清人舉人成化二年知奇嵐州蒞政三載教化
大行歲旱省刑撤從禱城隍曰吾與公幽明雖殊同
主一方忍眎斯民坐弊耶乃以鐵索各繫其頸同暴
烈日中頃之大雨任內嘉穀生祀名宦

張紀成化間任奇嵐警敏有才智舉不失當尤長於救
荒貧窶廢業者施給牛種流民皆歸

張鼎字大器陝西咸寧人成化間以進士知太原府鼎

受業薛文清與聞性命之指涖太原豪黠孟氏挾其家人暴里中鼎按以法指揮董敬誣人下獄已論斃鼎廉其枉出之後歷官戶部右侍郎

宋信字中孚趙州人成化五年以舉人任榆次縣知縣有清操不事鞭朴而張弛鑿鑿中理境內大治祀名宦

梁琮字廷玉蠡縣人成化二十二年以舉人任榆次縣知縣貌古樸言呐呐不出口而彊毅有為治具畢舉

祀名宦

劉偉陝西朝邑人成化間以進士任文水縣知縣持身清慎遇事剛方有為嘗違衆議積穀萬餘石備荒歉民卒賴之擢監察御史祀名宦

張壽陝西華陰人成化間以舉人任太谷縣知縣性高潔剛正有為時衣舊布袍飯脫粟佐以藜藿部使過邑中供億甚菲頗怒之既入其寢室惟律一部公服一襲乃亟加優禮任九年以內擢去祀名宦

李時弘治間任奇嵐剛柔適中賞罰必信當道才之累
行旌異陞漢中府同知民遮道餞送無不泣下

劉經直隸宛平人弘治間以舉人任太原縣知縣性坦
直政尚和平前令劉敏以嚴有聲經以寬繼之時稱
濟美擢監察御史祀名宦

溫敬武安人弘治五年以監生任榆次縣主簿操守甚
嚴請託竿牘咸謝絕有材幹能治煩劇祀名宦

張鐸字道鳴陝西人弘治六年以舉人任榆次縣知縣

持身清介視事後閉門絕客政平訟簡吏民皆懷尋
改嵐縣遮道泣留者數千人祀名宦

張鑑河間人弘治九年以舉人任榆次縣知縣性溫和
能恤民祀名宦

宇文鍾乾州人弘治九年以舉人任榆次縣教諭學問
閑博善開導諸生有疑義批卻導窺不數語輒曉暢
其以文來正者就所製為潤色頃刻數十篇人人悅
服後舉進士累官監察御史祀名宦

劉鉉陝西咸寧人弘治間以舉人任祁縣知縣有威嚴能執法人望而畏之祀名宦

楊光澤山東沂水人弘治間以舉人任興縣知縣廉而能寬撫字有方廢墜者及時建立尋調洪洞去之日老稚俱垂涕祀名宦

馬圖林縣人弘治間任興縣民素頑悍公賦累年不輸前官多被訟去圖至歎曰豈惟民之過哉蓋由刑罰不中民視官如仇讐耳當以公平處之居六年百姓

化其政前所負租悉為補輸改建文廟於城中及陞
去興人為立祠後任沁州知州致仕子卿登進士官
山西提學副使終都御史

申綸永年進士正德間以平陸調太原縣度量寬洪為
政持大體期年陞潞州知州官至按察司副使

高道邠州監生正德間任清源政寬民悅刑省令行有
真父母之稱

許孜咸陽舉人正德間哥嵐學正博極羣書誨人不倦

其堂聯云報國陶鎔忠孝士窮經講究聖賢心至今
傳誦

蘇民陝西人正德元年以進士任榆次縣知縣務持大
體不事苛細民有犯者以道義諭之不率始懲以法
暇日召諸生與之講解圖籍聞者奮起祀名宦

安國字良臣綏德衛人通春秋子史後襲世職指揮僉
事正德三年中武會舉第一為右副總兵協守大同
徙延綏十一年冬寇二萬騎分掠偏頭關諸處國偕

游擊杭雄馳敗之奇嵐州斬首八十餘級獲馬千餘匹寇遂遯晉都督同知卒諡武敏

李文號洛南正德間進士初任咸寧知縣陞主事恤刑陝西釋寃滯辯誣枉奏免逋欠數千人忤當道謫楚雄府推官改太原同知平孟礦之亂民賴以安及署平定篆釋獄禁緩征求節財用均徭役恤逃亡撫窮獨民用以和

梅寧歸德舉人正德間自平谷教諭陞任太原縣有治

事才前令修城數年不完寧至民咸樂趨一月畢工
武宗由榆林幸宣府路經太原供應之物凡百俱備
民不知擾

陳溥鄆陵人正德四年以進士任陽曲縣知縣性剛貞
而勤慎措施務洽民心擢監察御史祀名宦

鄭德崇字道夫山東汶上人正德六年以進士任榆次
縣知縣性簡重為政清而能整不樂以威刑督吏民
而服其化者皆肅然奉法後調德清縣祀名宦

張穆完縣人正德七年以舉人任榆次縣知縣性剛有威望遇事能斷抑侵漁剔浮蠹尤崇獎士類貧不能存者輒捐俸給之後以覲卒於道士民遙奠之哭聲震野祀名宦

陳惻陝州人正德九年以舉人任榆次縣知縣性嚴重為政務經久遠抑強除蠹興學校理冤抑祀名宦

韓光表直隸任邱人正德間以舉人任徐溝縣知縣正直勤政事自旦至暮治文書不輟心存愛民務令得

霑實惠祀名宦

王堯卿招遠人嘉靖初以監生任太原縣教諭待士以誠士咸服教與先教定興師範無以異後八年致仕諸生哭送聲震野祀名宦

徐元孝字子順浙江餘姚人嘉靖二年以舉人任榆次縣教諭性彞曠忽遽中言笑常自若循循善誘從遊者皆彬彬雅成名士典試四川擢平陸知縣祀名宦

宋橘濮州人嘉靖九年以舉人任徐溝縣知縣雅意愛

民興舉悉當飛蝗蔽天獨不入其境內祀名宦

俞鸞字應和陝西靈州守禦所人嘉靖二十二年以進士任榆次縣知縣精明有操守為政寬猛互濟稱能吏祀名宦

王一民東明人舉人嘉靖二十一年任文水令清節自持政平不擾築城垣建各鄉堡若干座後以誣劾掛冠去人共惜之

張天憲直隸高苑人嘉靖二十五年任太原縣縣丞性

廉潔泣事明敏待人以誠邑賦舊多逋天憲示以期
輸者雲集後以前任安化事望誤去官祀名宦

鄭鎬河南安陽人嘉靖二十六年以舉人任交城縣知
縣剛直有為修葺學校城池公署倉庾之敝壞者又
於城之四面及東南路植柳成林會歲饑人賴之以
濟後擢安州知州致仕去祀名宦

王遴字繼津霸州人嘉靖二十六年進士為兵部員外
郎爭楊繼盛事忤嚴嵩遷僉事再遷哥嵐兵備副使

有威名為巡撫所忌劾去官民相率訟冤詔許起用
仕至兵部尚書歸卒贈太子太保諡恭肅

王宮用字近臣直隸成安人嘉靖三十三年以進士任
榆次縣知縣前令率尚操切宮用獨馭以寬和訟平
賦清事咸就理邑稅歲千金多中飽宮用盡以報藩
司無所染政暇輒進諸生教以立身行己之要尋以
憂去後仕至太僕寺卿祀名宦

劉弘化湖廣長沙人嘉靖三十九年以進士任交城縣

知縣有吏材居官以廉能著未浹期政教大行尋調
安邑累官尚寶卿祀名宦

蕭大亨字夏卿山東泰安人嘉靖四十一年以進士任
榆次縣知縣性端嚴持大體不務赫赫聲而諸所厝
注士民咸食其利後總督宣大視榆人為故赤子撫
恤尤摯嘗以闕城卑薄為甃其四面榆人立石紀之
祀名宦

王珠鹽山人嘉靖四十五年以吏員任陽曲縣縣丞才

識明敏折獄能晰情偽善應對嘗議款塞外言辭侃侃聽者悚然尋擢大同府通判祀名宦

周誥汲縣舉人嘉靖間任徐溝沉靜有體馭下端嚴陞陝西苑馬寺寺丞平陽府同知

張天錫霸州進士由蘭州知州陞太原同知愷悌宜民陞陝西按察使僉事

江樊開化舉人貌樸心古詩詞敏捷嘉靖年太原府通判監修邊城齎金賑饑秋毫無染當道者稱之

薛端魏縣人嘉靖間任文水立政平易綜理詳密完逋賦均徭役誣訟風息吏畏民懷其清約勤慎始終不渝

王楫新泰人嘉靖間任太谷嚴明不苛豪猾斂跡政平訟簡庭無私謁雅意愛士貧者多方賑濟歸田行李蕭然父老傳頌之

崔三畏蠡縣進士嘉靖間任太谷有惠政民有犯先諭以義理而後治之未嘗任情以盡法尤注意於學校

後徵於朝士民遮道泣留歷官四川參政

張九經文縣舉人嘉靖間任太原通判居官守正不求聲譽一生嗜古好學不問家產

張世忠字顯甫山海衛人嘉靖五年舉武會試為大同參將拒寇丁家莊有斬獲功二十一年為山西叅將七月寇屯祁縣與副總兵段堂等合五營兵襲之堂軍潰於陸支村世忠力戰死贈左都督謚忠愍立祠致祭時百戶張宣張臣亦死並予卹而堂等胥論死

於惟一懷寧人嘉靖間以進士任太原府知府初下車
會歲比不登民多流亡即為繪圖上請不待報可徑
發倉廩賑之後擢陝西副使去之日送者塞路祀名
宦

張祉固始人嘉靖間以進士任太原府知府愷悌慈仁
數遇水旱躬為祈禱敵騎入犯士民惶恐內徙祉冒
雨登陴晝夜巡警累官陝西巡撫祀名宦

黃卿益都人嘉靖間以進士任太原府知府博學有操

行重農桑崇學校慎刑獄黃土塞大水漂沒居民以
千計掩骸賑恤不遺餘力民舍火將延及學宮泣拜
禱風反火熄在任六年擢浙江叅政後累官江西布
政使祀名宦

金礪字霜鍾河南西華人嘉靖間以進士任太原縣知
縣仁明能悉民隱舊造夏秋赤厯里書索費不貲計
事給食歲省五百餘金水利歲久壅淤相其高下開
新渠四十餘道溉田數百頃邵姚等都逃亡者過半

給以籽種緩其徭役復業者千餘家又以學校為育材地躬校閱賑貧乏鼓舞備至而涖任之初即製戎器火具若干簡閱訓練為百年計後遇敵竟以有備得免其經理詳密皆類此尋調汾陽父老爭走部乞留已復調陽曲涕泣攀卧車累日不得發陽城賈贈有文紀之

潘縉字朝紳陝西臨洮人嘉靖間以貢生任太原縣縣丞遇歲凶民朝夕不給而追呼者不為止抗顏與爭

竟得釋有婦抱子詣公庭懇其冤累日無所得食將就斃給以資斧又嘗念孤貧當隆冬有赤體者蠲橐中金買花布畀之而災黎無告待以舉火者且數千指也甫七閱月奉檄督逋賦不欲鞭扑窮民以博上官寵遂解組去太原人尸祝之尋請於學使祀名宦推官高陵李仙風有記

張承惠易州舉人嘉靖間任太谷性嚴毅人不敢干以私為政務持大體不事徼察抑侵漁杜奸弊治豪強

民賴以安尤加意於學校每朔望視學召諸生親授
講說一時文行丕變以覲事卒於京士民為之遙奠
哀泣

劉奎耀東鹿人嘉靖間以舉人任太谷縣知縣性嚴重
為政雅尚寬平民畏愛之如父母祀名宦

王允言直隸容城人嘉靖間以舉人任祁縣知縣負清
操有明敏才撫民以惠衙蠹市黠胥屏息嘗遇兵患
督吏民捍禦間并獲安祀名宦

李朝綱武功舉人嘉靖間奇嵐兵備道慷慨剛直風紀肅然州牧叅戎不相能裁之以法各自悔罪

馮友陝西長安人嘉靖間以舉人任奇嵐州知州奇嵐數遭兵患歲比不登友相視高下肥瘠教以耕作又時歷田間為言慈孝使知敦行誼成禮俗尋調忻州忻三歲三易守稱難治友馭以威嚴訟師一夕盡徙去中丞上其治行後擢保定同知祀名宦

張稽古陝西蒲城人嘉靖間以舉人任奇嵐州知州懃

直不畏強禦嘗按都御史楊順誣殺沈練事卒擬以
法順繫獄死後歷本省按察使晉藩常侍欲以事干
之固請遊別墅終弗許次日以盛饌來餽悉委棄溝
壑中還其器其剛介如此祀名宦

張崇德咸陽人嘉靖間以貢任嵐縣知縣政教修明嘗
遇邊警躬督吏民禦之北退復增修城池建祠祀焉
劉濬德平人嘉靖間以監生任嵐縣知縣剛毅廉介豪
猾斂迹祀名宦

高鵬山東人嘉靖間任太原營叅將標兵王慶等作亂
譟院門前巡撫踰垣避之鵬聞變披衣起坐堂上叛
卒適至羅拜階下曰我輩計出無聊願戴將軍為主
鵬以大義反覆開導不聽乃厲聲曰吾王臣寧守義
不為汝曹主也叛卒知不可奪遂殺之時嚴氏在朝
以危法中人寵賂滋章當事者惴惴方藉口以自解
免終無白鵬死事者然晉人至今稱鵬忠義不去口
溫訓漢陰舉人隆慶三年任太原同知頴悟博學善詩

文以清廉著稱陞戶部員外

王學謨朝邑人進士隆慶間寄嵐兵備道方正執法不
避恩怨嚴飭武備議築河壩老營諸堡尋陞山東叅
政

初旦博興舉人隆慶間任太谷遇事立斷百廢俱舉吏
畏其威民懷其德

殷廷舉江西星子縣舉人隆慶間太原府同知承檄均
丈定襄地糧悉心區畫不憚勞瘁臚列冊籍永為遵

守性慈祥所至輒進士民誨以孝弟力田之義一時
相聚如家人父子定襄人有遐思焉

薛懷奇河南新鄭人隆慶間以貢任交城訓導醇雅不
縈情勢利與人接歡然終日喜怒不形諸生私相慶
如在光風霽月尋為權相中傷去祀名宦

趙禧益都貢隆慶間文水丞時值寇警日集鄉兵聯什
伍登陴固守寇去民有遭殘毒者徧行弔問死者掩
埋之

王下賢陝西鳳翔人隆慶間以舉人任岢嵐州知州廉明有禦變才初下車敵大舉入寇下賢陰設守禦具倉卒悉備比大兵過糧餉芻秣能以時供給無缺又約束將卒不得入民舍恣暴虐民咸賴之祀名宦

李慤直隸人隆慶間任岢嵐谿達老成時邊警告急有欲生事要功者議於岢嵐西北掘要路築長城其策甚迂四野驚惑慤力抗不從民用以安

姚德重維縣人萬曆二年以進士任榆次縣知縣甘淡

泊事上官恭謹有禮馭衙蠹市黷以嚴撫恤窮黎則
又曲有恩意祀名宦

吳三省洛陽人萬歷四年以舉人任徐溝縣知縣疾惡
如讐廉幹有為凡事不屑近功嘗甃縣城為萬年保
障祀名宦

李選白河人萬歷八年以選貢任陽曲縣縣丞雅度清
操聽訟多所平反時大令屈灼以嚴肅勝選以寬大
佐之民愛戴如父母擢知縣去祀名宦

李光祖字克肖保安人萬歷十一年以進士任榆次縣知縣仁慈能濟以嚴毅嘗遇歲饑賑給有法窮乏不至流移人尤感頌不置後擢監察御史祀名宦

于天經冠縣人萬歷十四年以進士任陽曲縣知縣清勤愛民初涖任即策款段馬日隨二隸巡行阡陌間勤課農桑倦則止僧舍炊脫粟飯遇訟者以片詞折之歲饑停徵調屢蒙譴責不為動尋以艱去攀卧數千人祀名宦

徐守謙洛陽人萬歷二十三年以進士任陽曲縣知縣通敏有吏才先任榆次有能聲遂以陽曲煩劇調涖之果斷明肅剖決如流治行大著擢監察御史未任卒士民立石識之祀名宦

周永春金鄉人萬歷三十年以進士任陽曲縣知縣念省會習俗奢侈以節儉為先委曲開導又邑為藩封地豪宗橫肆多誣陷平民裁以法涖任五年擢禮科給事中祀名宦

史記事字義伯陝西渭南人萬歷三十一年以進士補榆次縣精明果斷先任介休功績最著涖榆次益銳意民事築城濬渠嘗修縣志於邑徭役三致意焉後陞兵部主事改雲南道監察御史榆民建祠祀之並勤實政於石

劉似鰲字占宇直隸高陽人萬歷四十四年以進士任榆次縣知縣鯁直負氣節先任聞喜調榆次捐俸設義學延名士主師席開東陽鎮水渠溉田數十頃分

校鄉試秩滿擢刑部郎後以莊浪道佩四符辦理軍務卒於官事聞朝廷嘉其忠勤予祭葬

周詩山東德州人萬歷間以進士任太原府知府性剛直諳練庶務冤抑鋤豪猾寬嚴互劑時稱良守以乞休去祀名宦

王嗣美朝邑人萬歷進士為太原推官持己廉約接人平恕每聽斷多所平反以明允稱擢戶科給事中

李元同州進士任祁縣平恕廉明均徭役省解納飭學

宮恤行戶開渠穿井清驛彌盜革一切賠累剝削之苦民德之兩地立祠

談應春安化舉人萬厯間授興縣教諭率先化導士風丕變陞任嵐縣吏民畏威逋賦爭輸每朔望進弟子而誨文藝孜孜不倦

屈鍾嶽字毓秀蒲城舉人萬厯間任太原清慎敏捷循聲藉藉尋轉光祿署正遷北部郎擢大同知府未幾卒鍾嶽有豁達之度不事纖趨居官正直不阿旅櫬

歸里行李蕭然

孫化龍獲鹿人萬歷間以進士任太原府知府孟有妄
男子假巫為奸利龍廉得其狀時適亢旱因使問雨
期巫窮伏按左道法誅之在官數年能以廉靜率先
屬邑祀名宦

賈毓祥平度人萬歷間以進士任太谷縣知縣操守嚴
潔興利除害當時有真父母之稱祀名宦

張子清無極貢萬歷間任太谷興學育士減稅甦民晉

中有何處春臺似太谷之謠八年陞永寧州

李懸同州人萬歷間任祁縣知縣明斷有守興學校均
征徭開渠利民凡賠累苛派之弊毅然豁除被其德
者咸深愛戴立祠祀之

王一龍陝西蘭州人萬歷間以舉人任徐溝縣知縣剛
毅不畏強禦撫恤士民恩意曲摯後以抗閹宦謫官
士民稱屈祀名宦

于彥英直隸固安人萬歷間以舉人任徐溝縣知縣器

識英敏發摘奸伏如神嘗丈量地畝立法均平民咸
德之祀名宦

馬天俸密雲衛人萬歷間任清源公明廉幹清丈地畝
均平糧石地方永賴

周壁山東歷城人萬歷間以舉人任交城縣知縣實心
愛民雅甘淡薄裁冗費墾荒田開河渠繕城堡尤加
意學校於貧不能自存者時時賑給之祀名宦

姜一鳴陝西蒲城人萬歷間以舉人任文水縣知縣清

介自持治窩禁暴其清丈田土賑恤凶荒民尤被實
德云祀名宦

郭宗賢直隸邯鄲人萬厯間以舉人任文水縣知縣嚴
明識體要嘗修邑城迄今稱保障祀名宦

文養浩耀州舉人萬厯間任文水嚴革私科勾攝弊差
木皂積穀備荒四境肅靜調嵐縣歷雲南知府建祠
柏茆山巔祀之

陳良謨吳江舉人萬厯間文水教諭治書經聯社課藝

從學者雲集中丞魏學憲杜檄詣鎮城書院訓多士
甲午秋就聘分較闈中稱得人鄭之僑王在臺鄭宗
周皆出其門後陞涪州知州

李從心南樂進士萬厯間奇嵐兵備道嚴禁州縣饋遺
重懲刁惡待軍民以恩收羅才勇以備時用人人奮
敵愾之思吏治民情無一不悉

趙彥膚施人萬厯間以進士任奇嵐兵備道有應劇才
尤精兵畧嘗徧歷所部相度衝緩勾稽芻糧具能得

其要領因為添防守易將衛廣城堡選智勇節省浮費逾十餘萬又修保德城高墉崇雉民勒政績於石立祠祀之

董仕河南汝陽人萬厯間以舉人任岢嵐州知州寬仁不喜立威獨於亂法之民不少假嘗廉健訟者立斃於獄一邑稱快擢潞安同知祀名宦

趙夢麟廣平進士由兵部主事謫任嵐縣清丈土地編審丁徭杜豪戶之兼併清奸胥之隱詭重建公廨百

廢具舉陞兵部員外

張任學安岳人天啓五年進士授太原知縣以才調榆
次崇禎四年舉治行卓異入為御史後請易武階改
河南總兵官褫職卒

毛文炳河南鄭州人崇禎四年以進士自壽陽縣調榆
次縣作興文教嚴禁賭博十七年歷任太原府冀寧
道城陷死節入名宦祠

湯啟祥江南宜興人崇禎間以進士任太原府知府有

清操不妄取愛民如子於奸猾為害者窮治不少貸
頌聲大起祀名宦

孫康周字晉侯安邱人舉於鄉崇禎末知太原府流賊
入率死士巷戰被執說降不從乃見殺

任孔當濟寧進士崇禎間任陽曲俯詢利弊立為興革
時久旱步禱百里未至城大雨如注以艱去攀轅卧
留者擁蔽不能行

彭而述河南鄧州人崇禎十四年以進士任陽曲縣知

縣捐金修城募民兵三百人號太原忠義營甲冑旗幟具備又買馬騾四百頭捐乘馬四匹給驛傳新城南狄梁公祠並衿其後裔使奉祭祀歲饑煮粥哺飢民祀名宦

范志泰虞城人為長史崇禎末署陽曲縣事流賊陷城不食死

岳維楨直隸東明人崇禎間以保舉任清源縣知縣時值歲大饑盜賊蜂起維楨留心撫字俾民不流離又

偵盜賊所在搗其巢穴殄滅之災患所在捍禦必力
鄰邑胥獲安堵祀名宦

薛國柱陝西吳堡人崇禎間以進士知交城縣純樸精
明能聽訟勤課士以時值流寇亂甃邑城四面鼓舞
有方不期月事集後陞河南汝寧道監軍督餉祀名
宦

張首標直隸玉田人崇禎間以進士知交城縣剛腸疾
惡善折獄喜與儒生遊捐俸課藝親定甲乙調汾陽

祀名宦

王凝命崇禎間任交城縣知縣廉幹有為時寇盜孔棘
悉力剿撫邑人胡曰蕃以犒軍歿於賊殮而殯之為
文以祭卹其家特厚祀名宦

武清周華州舉人崇禎間任文水性剛正胥吏懾服值
內璫過邑清周持以大體不少屈調繁汾陽縣

趙希壯崇禎間任文水典史慷慨負氣雖微官不肯自
苟適流寇入縣境親督鄉兵往偵猝與賊遇遽前搏

戰沒於陣

井東星朝邑舉人崇禎間任嵐縣嵐多逋賦東星勸輸
有法民不擾而賦集致仕歸闔亂死節

國朝

梁加琦陝西安寨人有勇畧順治元年以將材從征闔
賊西走收太原加琦充前鋒宣布

朝廷德意聞者胥踴躍歸附陝督孟喬芳薦授遊擊後
任四川總統

楊三知字筠伯北直良鄉人順治三年以進士知榆次
有膽畧氣節雲中姜變與紳民誓守不渝宿城上者
六月卒保全又捐俸三百金創建社學置地五十畝
延師訓士歷陞神木道死難恤贈如例

曹之賢遼東人順治四年以官生知文水縣年少精敏
剖決如流吏民畏服姜逆之亂其黨率兵來攻竭力
捍禦城陷遇害

李昌汴豐縣人順治四年知興縣剛方有守姜逆之亂

城陷被執賊索印昌汴力抗不少屈遂為賊殺

贈按察司僉事祀忠烈祠

張國賢直隸宛平人順治五年以舉人任太原府中路同知姜逆之亂慷慨臨戎以死事著

贈按察司副使祀忠烈祠

徐淳遼東人順治間任岢嵐兵備僉事道姜逆之亂偏關遙應之淳為賊所執脅降不屈死

贈光祿寺少卿廕子入監祀忠烈祠

馬維熙順治間任忻州州同署太原府西路通判上官
胥廉其才姜逆之亂偏關兵變不屈被殺

贈忻州知州祀忠烈祠

賈道醇蒲州人順治間以歲貢任太谷縣教諭姜逆之
亂偕署縣楊守城及陷賊執繫獄後先殉節

贈國子監助教祀忠烈祠

何顯祖順治間任陽曲縣主簿署忻州知州事有幹濟
聲姜逆之亂督糧於鄉中塗遇賊被害

贈太原衛左衛經歷祀忠烈祠

楊其籍順治間任按察司照磨署太谷縣事有政聲姜逆之亂賊縛其籍逼降不屈繫獄死

贈布政司知事祀忠烈祠

王自亮順治間任太谷縣典史克舉其官姜逆之亂協守縣城城陷繫獄以死

贈濟源縣主簿祀忠烈祠

周邦翰順治間任布政司都事姜逆之亂賊徧西山交

城缺令人胥憚往邦翰獨請行招集流亡斬撫定驚
氓適賊有內應邦翰拔佩刀擊亂者刀未出室為左
右所殺

贈都司經歷祀忠烈祠

鄭運昌江南人順治間任交城縣典史有能聲姜逆之
亂與署縣周議分城以守內應起遂與周同日遇害
贈山陽縣主簿祀忠烈祠

謝應舉順治間任巡捕都司死姜逆之亂

贈遊擊祀忠烈祠

王廷衡陽曲人順治間任都司營中軍姜逆之亂賊據
太原縣晉祠鎮廷衡繕攻具賊焚之燬焉廷衡中乙
酉武鄉試第一以死勤事

詔恤其家祀忠烈祠

宋貴中順治間任冀寧道營千總死姜逆之亂

詔恤其家祀忠烈祠

王命新順治間任舊營千總死姜逆之亂

詔恤其家祀忠烈祠

邊大綬直隸任邱人順治八年任太原府知府有綜理才鉅細畢舉當姜鑲初平撫循而綬又之不遺力閭閻寢有起色涖任五年號有治績

吳起爵廣東海陽人以克澎湖有功授太原總兵艱歸祀瓊州名宦

劉果山東諸城人康熙三年以進士任太原府推官首捐俸修文廟立義學以課山谷秀民太原榆次諸縣

引汾水溉田民滋爭訟果勤勘驗詳教條遠近先後
胥有次第爭乃息大盜傅青山李黃毛等盤踞交城
葫蘆峪出沒無常投計趙令吉士曰當以勦為撫亦
即以撫為勦未幾羣盜後先投首富人某訟產先餽
黃金五百假黃鼠以進峻却之當時謠曰死黃鼠瞞
不過活青天後弟縻亦以進士知平陽府有治績

王惟籌華州人康熙四年以舉人任祁縣知縣創義學
肄書課藝祁水為豪強所據民不得灌溉毀其壩俾

無敢壅以自利解組歸民為立祠

趙吉士字天羽休寧人杭州府學生順治八年舉鄉試
康熙七年銓知交城縣事交城居萬山中巖磴參錯
畜馬絕有力又饒灌木時民間畜馬有禁上官廢南
堡村木廠許汾河市賣由是利為文水商民所奪交
人重困往往去為盜吉士首閱武郭南令下士卒有
序會年饑錄餓者七十人完解舍垣墻使家人與處
詢羣盜出沒所在多得其實乃申明乘墉保甲團練

之法躬詣河北都行荒政日暮留宿陶穴詰朝相度
蹊徑通塞村砦近遠知最險者三坐崖東西兩葫蘆
川繞其下塞葫蘆口則軍不得進據三坐崖則軍不
克登遂默識之而還十年十月朔上官檄進勦吉士
令葺靖安堡期以月幾望兵進屯先七日置酒城隅
却月湖張樂於舫許老稚夾岸縱觀越宿復要客剪
燭賦詩密誠司夜者從更籌於子刻打五鼓吉士起
送客出郭則守備姚順等已先受約統步騎兵四百

集南關外疾行四十里饗士卒水泉灘分三隊並進
入兩葫蘆川據三坐崖賊鳥獸散散復合且戰且奔
官軍分搜巢窟獲魁渠二十二人餘或降或自剄召
山民不作賊者三十七家賚以羊酒其素不當夫徭
者千四百三十家編其籍入都圖入山旬有六日交
山寇平又修圖經立倉廩定軍營課民種柳鑿山通
龍門渠以溉田遂力請復南堡村木廠秣善馬於驛
巡撫上其狀入為戶部山西司主事後選戶科給事

中卒

趙良璧奉天開原人康熙八年以廕生知徐溝縣徐彈丸邑當孔道供億煩重良璧送迎餽餉胥謝絕涇政五年寬嚴並濟以清源盜案呈誤去後歷西安府同知猶念徐溝科第少札召紳士斥四百金俾築文峰邑東南云

孫闕達江南通州人康熙十三年以進士知太原縣性簡潔食不重味政先慈恕不輕敲扑犯者至死胥感

頌不輟立義學刊省身錄功過格感應篇梗贊興起
乙卯同考鄉試拔魏學誠象樞子也後以病歸行李
一如始至

儲方慶江南宜興人康熙十四年以進士知清源縣時
軍興辦供億又山水數漲為城害歲修白石堰禦之
吏緣為姦利民滋擾方慶性介潔糗糧芻藁之費胥
假貸以辦不徵民間一錢趙成田茂諸逋賦暨貧不
能娶者多捐俸佐之復以民餽運不給因停修堰

役步禱白龍神廟明年春山水改道而南去城十里
喜曰吾可保清邑數十年無患矣乃移建白龍神廟
以鎮之月集諸生較藝後多成名時諸上官爭為引
重問入幕賓姓名而事胥手裁幕中故虛無人也三
年應博學宏詞試去然猶以城東南隅瀦湖水非民
利經畫不克展為憾云

甘國基正藍旗漢軍康熙二十七年任太原府知府性
敏果綜練庶務上官倚之如左右手讞獄以片言折

之情偽如指掌市黷衙蠹胥斂迹而不專以擊斷為能嘗捐俸覓乳媪育嬰兒失養者又設義塚瘞枯骨在任七年賢聲懋著

唐廉四川人康熙三十六年以舉人知陽曲縣性儉樸衣布衣不曲事上官歲時儀節胥絕尋中吏議罷歸未幾再起知縣事卒不少屈接紳士以禮而請託則堅拒弗許民以事至引至堂前語疊疊不厭而飭法者按治不少貸馭吏嚴而有恩前後蒞任凡七年解

組時做車羸馬行李蕭然人皆謂適符其名云

山西通志卷八十八

欽定四庫全書

山西通志卷八十九

名宦

七

平陽府

周

趙朝趙勝曾孫魏獻子為政以為平陽大夫謂朝餘子
之不失職能守業者也

僚安晉人魏獻子為政以賢舉為楊氏大夫

卻驍缺從子景公時大夫食邑於襄陵與卻至卻錡並稱號三卻俱有才辨為使有禮謀事有智臨戎有文

漢

葛龔字元甫梁國寧陵人以善文記知名性慷慨壯烈勇力過人永初中舉孝廉拜蕩陰令州舉茂才為臨汾令居二縣皆有稱績著文賦碑誄書記凡二十篇皇甫嵩字義真安定朝那人度遼將軍規之兄子也父節鴈門太守嵩少有文武志介好詩書習弓馬初舉

孝廉茂才為臨汾令父喪去官後平黃巾封槐里侯
拜太尉卒贈驃騎將軍印綬

魏

鍾繇字元常潁川長社人建安中以司隸校尉持節督
關中諸軍會單于擾平陽率諸軍圍之未拔而袁尚
河東太守郭援到衆甚盛諸將議欲釋之去繇曰袁
氏方強援之來關中陰與之通所以未悉叛者顧吾
威名故耳若棄而去示之以弱所在之民誰非寇讐

縱吾欲歸其得至乎此為未戰先自敗也且援剛愎
好勝必易吾軍若渡汾為營及其未濟擊之可大克
也時張既說馬騰騰遣子超將精兵逆之援至果輕
渡汾衆止之不從濟水未半擊大破之斬援降單于
後詔徵河東太守王邑邑心不願徵郡掾衛固及中
郎將范先等詣繇求乞邑而後太守杜畿已入界繇
不聽先等促邑交符邑乃歸許固尋與張晟張琰及
高幹等並為寇又率諸將討破之繇封定陵侯仕至

太傅卒諡曰成

張旣字德容馮翊高陵人舉茂才司隸校尉鍾繇遣說
馬騰等騰遣子超會擊袁氏并州刺史高幹河東太
守郭援大破之斬援幹降而復舉兵河東衛固等應
之以旣為議郎參繇軍事徵馬騰等會擊斬固幹奔
荊州魏時封西鄉侯卒諡曰肅

杜畿字伯侯京兆杜陵人舉孝廉建安中高幹舉兵并
州河東太守王邑被徵河東人衛固范先外以請邑

為名而內實通幹魏武謂荀彧曰河東被山帶河四鄰多變當今要地也君為我舉蕭何寇恂以鎮之彧曰杜畿勇足以當大難智能應變乃其人也於是追拜畿為河東太守固等使兵絕陝津彧謂畿曰宜須大兵畿曰河東有三萬戶非皆欲為亂也今兵迫之急欲為善者無主必懼而聽於固固等勢專必以死戰討之不勝四隣應之天下之變未息也討之而勝是殘一郡之民也且固等未顯絕王命外以請故君

為名必不害新君吾單車直往出其不意固為人多計而無斷必偽受吾吾得居郡一月以計縻之足矣遂詭道從邸津度范先於門下斬殺主簿已下三十餘人畿舉動自若固曰殺之無損徒有惡名遂奉之畿謂衛固范先曰衛范河東之望也吾仰成而已然君臣有定義成敗同之大事當共平議以固為都督行丞事領功曹將校吏兵三千餘人皆范先督之固等喜雖陽事畿不以為意固欲大發兵畿患之說固

曰今大發兵衆必擾不如徐以貲募兵固遂為貲調發數十日乃定又入喻固等曰人情顧家諸將掾吏可分遣休息固等惡逆衆心又從之於是善人陰為援惡人分散固等密調兵未至畿知諸縣附已因出赴張辟拒守固等與幹晟共攻畿不下遂敗固等伏誅黨與皆赦之使復其居業時郡縣皆殘破河東最先定少耗減畿治之崇寬惠與民無為嘗詞訟有相告者畿親見為陳大義遣令歸諦思之若意有所不

盡更來詣府鄉邑父老自相責怒曰有君如此奈何
不從其教自是少有詞訟班下屬縣舉孝子貞婦順
孫復其徭役隨時慰勉之漸課民畜犉牛草馬下逮
雞豚犬豕皆有章程百姓勸農家家豐實畿乃曰民
富矣不可不教也於是冬月修戎講武又開學宮親
自執經教授郡中化之韓遂馬超舉兵河東雖接境
民無異心魏武西征至蒲阪與敵夾渭為軍軍食一
仰河東及敵破餘粟二十餘萬斛下令曰河東太守

杜畿孔子所謂禹吾無間然矣增秩中二千石魏武
征漢中遣五千人運運者自率勉曰人生有一死不
可負我府君終無一人逃亡其得人心如此魏國建
入為尚書事平更令曰昔蕭何定關中寇恂平河內
卿有其功間將授卿以納言之職顧念河東吾股肱
之郡充實之所足以制天下故且煩卿卧鎮之畿在
河東十六年常為天下最魏初封豐樂亭侯為尚書
僕射試船陶河沒贈太僕謚曰威畿初在郡被書錄

寡婦畿但取寡者故所送少及趙儼代畿而所送多
民益思之子恕正始中官河東太守所在務存大體
其樹惠愛益得百姓歡心雖不及畿而立朝建議蓋
有可觀焉後河東樂詳年九十餘上書頌畿之遺績
朝廷感焉詔復封孫預為豐樂亭侯

吉茂字叔暢馮翊池陽人建安中舉茂才除臨汾令居
官清淨吏民不忍欺轉為武德侯庶子景初中卒茂
修行從少至長室如懸磬饋遺一不肯受

呂虔字子洛伍城人魏太祖在兗州聞虔有膽策以為從事將家兵守湖陸襄陵尉杜松部民炆母等作亂與昌稀通太祖以虔代松虔到招誘炆母渠帥及同惡數十人賜酒食簡壯士伏其側察炆母等醉盡格殺之撫其餘衆羣賊乃平太祖以虔領太山太守徐州刺史封萬年侯

晉

徐邈字景山燕國薊人黃初中歷平陽太守所在著稱

封都亭侯官至司空嘉平初卒謚曰穆朝廷追思清
節之士詔曰夫顯賢表德聖王所重舉善而教仲尼
所美故司空徐邈征東將軍胡質衛尉田豫皆服職
前朝厯事四世出統戎馬入贊庶政忠清在公憂國
忘私不營產業身沒之後家無餘財朕甚嘉之其賜
邈等家穀二千斛錢三十萬布告天下

李重字茂曾江夏鍾武人太熙中為行討魯護軍平陽
太守崇德化修學校表篤行拔賢能清簡無欲正身

率下在職三年彈黜四縣弟嶷亡表去官永康初趙王倫用為相國左司馬以憂卒家貧宅宇狹小無殯殮之地詔典客署營喪追贈散騎常侍謚曰成

李矩字世迴平陽人封東明亭侯為平陽郡督護後鄉人推為塢主愍帝時領河東平陽太守饑饉相仍又多疫癘矩垂心撫恤百姓賴焉會長安羣盜東下所在多虜掠矩遣部將擊破之盡得賊所略婦女千餘人諸將以為非矩所部欲盡留之矩曰俱是國家臣

妾焉有彼此乃一時遣之後至魯陽墜馬卒

北魏

崔元珍博陵安平人正光末山胡作逆除平陽太守假
右將軍為別將以討之頻破賊郡內以安武泰初改
郡為唐州仍除刺史加右將軍以破賊勲賜爵涼城
侯爾朱榮之趣洛也遣其都督樊子鵠取唐州元珍
與行臺郎酈惲拒守不從為子鵠所陷被害世咸痛
之

高市貴善無人少有武用孝昌初恒州內部敕勒劉崙等聚衆反市貴為都督率衆討崙一戰破之預翼戴莊帝勲為秀容大都督第一領民酋長賜爵上洛縣伯爾朱榮擊葛榮於滏口為先鋒都督榮平除使持節汾州刺史尋為晉州刺史紇豆陵步藩侵并州高祖破之市貴亦從行有功封常山郡公高祖起義市貴預其謀天平初復除晉州刺史高祖尋以洪洞要險遣市貴鎮之沙苑失利晉州行事封祖業棄城而

還州民柴覽聚衆作逆命市貴討覽覽奔柴壁市貴
破斬之是時東雍南汾二州境多盜因市貴平覽皆
散歸復業後秀容人五千戶叛應山胡復為行臺統
諸軍討平之元象中除晉州刺史西道軍司卒子阿
那肱

北齊

莫多婁貸文太安狄那人驍果有膽氣從高祖舉義封
石城縣子從平爾朱兆於赤嶺獲兆屍天平中除

晉州刺史汾州胡賊為寇竊高祖親討之以貸文為
先鋒每有戰功還賚奴婢三十人牛馬各五十匹布
一千仍為汾陝東雍晉泰五州大都督後與太
保尉景攻東雍南汾二州克之元象初與周軍戰沒
於源澗子敬顯彊直勤幹恒從斛律光征討數有戰
功位至領軍將軍武平中車駕幸晉陽每令督留臺
兵馬糾察盜賊京師肅然七年從後主平陽敗歸并
州與唐邕等推立安德王稱尊號安德敗羣官皆投

周軍惟敬顯走還鄴周平鄴執斬於閭闔門外責其
不留平陽也

封子繪字仲藻渤海蓐人隆之子也太昌中從定并汾
肆數州平爾朱兆及山胡等孝靜初從征夏州二年
除衛將軍平陽太守晉州北界霍山舊號千里徑山
坂高峻每大軍往來士馬勞苦子繪啟高祖請於舊
徑東谷別開一路高祖從之仍令子繪領汾晉二州
夫修治旬日而就高祖親總六軍路徑新道嘉其省

便賜穀二百斛後大軍討復東雍平柴壁及喬山紫
谷絳蜀等子繪恒以太守前驅慰勞徵兵運糧軍士
無乏四年西討為大都督領冀州兵從高祖自滏口
西趣并州會大軍於玉壁及師還晉陽引入內室面
受密旨銜命山東安撫州郡河清三年卒謚簡

斛律光字明月朔州勅勒部人金子也少工騎射以武
藝知名當時傳號落雕都督天保三年除晉州刺史
東有周天柱新安牛頭三戍招引亡叛屢為寇竊七

年光率步騎五千襲破之又大破周儀同王敬雋等
獲口五百餘人雜畜千餘頭而還九年又率衆取周
絳州白馬澮交翼城等四戌除朔州刺史十年二月
率騎一萬討周開府曹迴斬之栢谷城主儀同薛禹
生棄城奔遁遂取文侯鎮立戌置柵而還乾明元年
除并州刺史河清二年四月率步騎二萬築勲掌城
於軹關西仍築長城二百里置十三戌三年正月周
遣將達奚成興等來寇平陽詔光率步騎三萬禦之

成興等聞而退走光逐北入其境獲二千餘口而還
遷司徒冬又以邛山大捷遷太尉天統元年轉大將
軍三年襲爵咸陽王并襲第一領民酋長轉遷太保
武平元年詔加右丞相并州刺史冬率步騎五萬於
玉壁築華谷龍門二城與周齊國公宇文憲申國公
拓跋顯敬等相持憲等不敢動光乃進圍定陽仍築
南汾城置州以逼之夷夏萬餘戶並來內附二年率
衆築平隴衛壁統戎等鎮戍十有三所周柱國枹罕

公普屯威柱國韋孝寬等步騎萬餘來逼平隴與光戰於汾水之北光大破之俘斬千計軍還詔復令率步騎五萬出平陽道攻姚襄白亭城戍皆克之獲其城主儀同大都督等九人捕虜數千人拜左丞相光在朝堂嘗怒祖珽帝賜穆提婆晉陽之田光言於朝曰此田神武帝以來常種禾飼馬數千匹以擬寇難今賜提婆無乃闕軍務也繇是祖穆積怨周玉壁城將韋孝寬作謠言令間諜漏其文於鄴曰百升飛上

天明月照長安又曰高山不推自崩樹不扶自豎
祖珽穆提婆暨何洪珍因構譖之乃引光入拉殺於
涼風堂盡滅其族惟小子鍾年數歲獲免周武帝聞
光死大喜赦其境內後入鄴追贈上柱國公指詔書
曰此人若在朕豈能至鄴

北周

柳霞字子昇河東解人曾祖卓徙襄陽霞幼而英爽邁
世父慶遠特器異之霞為岳陽王謦聞喜縣公持節

侍中後訢以襄陽歸周保定中訢入朝授使持節驃
騎大將軍開府儀同三司霍州諸軍事霍州刺史霞
導民務先以德再三不用命者乃微加貶異示之恥
而已其下感而化之不復為過咸曰我君仁惠如此
其可欺乎天和中卒

隋

李徹字廣達朔方巖綠人性謹厚有才具初仕周宇文
護子中山公訓為蒲州刺史令徹以本官從焉建德

五年從武帝伐齊拔晉州與齊王憲屯鷄栖原齊主以大軍至戰於晉州城北憲師敗徹與楊素宇文慶等力戰軍賴以全復從帝破齊師於汾北乘勝下高壁拔晉陽封蔡陽縣公隋初轉雲州刺史晉王廣鎮并州妙選正人有文武幹者為之寮佐詔徹總晉王府軍事時蜀王秀亦鎮益州上謂侍臣曰安得文同王子相武如李廣達者乎其見重如此以軍功累封安郡公進位柱國開皇十年徙封城陽郡公卒

周搖字世安洛陽人剛果有武藝性謹厚動遵法度初仕魏開府儀同三司搖從平齊每戰有功授柱國封夔國公拜晉州總管時隋高祖為定州總管文獻皇后自京師詣定路經搖所至禮甚薄白后曰公解甚富於財限法不敢輒費又王臣無得效私高祖以其奉法每嘉之隋開皇中卒謚曰恭

宋老生未詳何處人代王侑遣老生帥兵三萬守霍邑唐兵至老生與戰馬蹶被擒死之事見人物明成化

八年知州鮑克恭立祠墓前

唐

李孝恭高祖族姪武德中平蕭銑輔公柝封河間王歷
晉州刺史貞觀中為禮部尚書卒諡曰元

蕭瑀字時文梁明帝子初仕隋內史侍郎嘗從幸鴈門
瑀進謀曰可賀敦與兵馬事況義成公主乎若走一
介使鐫喻宜不戰而解又願赦高麗專討突厥則人
自奮從之突厥果解去武德初歸唐封宋國公貞觀

中授晉州都督歷太子太保卒諡貞

劉齊賢魏州觀城人道祥子襲封自侍御史出為晉州
司馬高宗聞其方正甚禮之時將軍史興宗從苑中
弋獵因言晉州出好鷄劉齊賢見為司馬請使捕之
上曰劉齊賢豈覓鷄人耶卿何以此待之遂止永淳
元年累遷黃門侍郎同平章事代裴炎為侍中力辦
炎事再貶吉州被害

李寬永徽二年為晉州刺史於臨汾縣東二十五里夏

柴堰引滴水溉田

陶善鼎為臨汾縣令縣東北十里舊有高粱堰武德中引高粱水溉田入百金泊貞觀十三年為水所壞永徽二年刺史李寬自東二十五里夏柴堰引滴水溉田善鼎復治百金泊亦引滴水溉田乾封二年堰壞乃西引晉水盡心民事

崔翳為曲沃令永徽元年於縣東北三十五里開新絳渠引古堆水溉田百餘頃

張懷器以成均學生明經擢第俄補麟臺校讐累官至咸陽縣丞嗣聖間以應舉及第授翼城令引翔高之泉以便灌溉開會陰之道以通行旅又闢荒田五百餘頃邑人愛之盧照鄰為作去思碑

尹思貞京兆長安人舉明經長安中累遷秋官尚書以忤張昌宗再徙晉州刺史前後為十三州刺史皆以清簡為政奏課連最封天水郡公遷御史大夫卒贈黃門監諡簡

魏知古深州陸澤人第進士神龍中授晉州刺史累遷
同中書門下三品為侍中封梁國公罷政使卒謚曰
忠宋璟聞而嘆曰叔向古遺直子產古遺愛兼之者
其魏公乎

蕭至忠沂州人秘書丞少監德言孫神龍中拜黃門侍
郎同平章事遷侍中中書令景雲初出為晉州刺史
甚有能名默啜遣大臣來朝見至忠風采逡巡畏俯
謂人曰是宜入相何乃居外乎先天二年復為中書

令

康日知靈州人祖植當開元時縛康待賓封天山縣男
日知事李惟岳為趙州刺史惟岳拒命與部下共盟
固州擢深趙觀察使復破王武俊徙奉誠軍節度再
轉晉絳加檢校尚書左僕射封會稽郡王卒贈太子
太師

崔倫字叙及深州安平人第進士歷吏部員外郎陷祿
山不汙偽官下遷晉州長史李齊物訟其忠授長安

令使吐蕃拘留六年不屈卒贈工部尚書

李侃建中末項城令李希烈遣兵攻之侃嚴守不下賊引去詔遷太平令

李愬晟子德宗初為晉州刺史以治異等加金紫光祿大夫後以平蔡功累進尚書左僕射同中書門下平章事

韋丹字文明京兆萬年人孝寬六世孫舉五經高第元和元年拜晉慈隰觀察使封咸陽郡公閱歲自陳所

治三州非要害地不足張職為國家費不如屬之河
東上從之徙江南西道觀察使有惠政載元和實錄
王逢許州人忠武軍節度沛子以功歷諸衛將軍太和
中從石雄劉沔破回紇於天德軍王宰攻劉稹逢領
陳許七千人屯翼城賊平累遷忠武節度使

王式太原人起子擢賢良方正科大中中為晉州刺史
飭郵傳器用畢給會河曲大歉流民徙他州不納獨
式勞恤之活數千人時特峨胡亦饑將入寇汾澮聞

式嚴備不敢道境報其種落曰晉州刺史當避之以
善最稱後平浙東仇甫功尤偉終左金吾大將軍

後唐

張仲溫長興元年為翼城令才識饒敏縣舊治翔高山
下風氣雖敦而險隘不足仲溫建議徙置王逢寨據
險以守今縣治即其地也

後周

程光遠顯德間由進士以大理司直兼監察御史守翼

持清介杜賄遺弊絕風清百姓戴之如父母風厲著
聞鎮邊使王德都虞候張進鎮翼常戒其下曰勿犯
程公其見嚴憚如此

宋

楊廷璋字溫玉正定人周初為昭義兵馬都監世宗時
鎮晉州有惠愛厲拔北漢堡砦置保安興同白壁等
十餘砦遣監軍李謙溥知隰州合勢大敗并人世宗
喜曰吾舅真能禦寇詔褒之加檢校太保恭帝加檢

校太傅宋初加檢校太尉吏民詣闕請立碑頌功德
命盧多遜撰文賜之李筠潛遣吏齎蠟書求援械送
汴京因上攻取策即下詔委以經略及率所部入陰
地分賊勢賊平歸鎮廷璋善待士幕府多知名人在
晉州命荆罕儒為鈐轄罕儒以廷璋周朝近親每入
府中從者皆持刀劍欲圖廷璋廷璋推誠待之殊不
設備罕儒亦不敢發終亦無患

王晏徐州滕人戍陝州斬遼將劉愿歸漢祖以為絳州

防禦使遷建雄軍節度加同平章事周祖加兼侍中
廣順元年劉崇來侵敗之宋初封趙國公從征李筠
致仕卒

趙贊字元輔幽州薊人延壽子七歲誦書二十七卷賜
童子及第後遼署河中節度延壽北歸贊得留鎮河
中漢祖加檢校太尉仍鎮河中宋乾德六年為建雄
軍節度秋為汾州路部署開寶二年又為河東道行
營前軍馬步軍都虞候車駕薄城下分軍四面贊扼

其西偏并人乘勝自突門潛犯贊壘贊率衆擊之久而方退弩矢貫足太祖勞問數四賜良藥傅之四年改鄜州太宗封衛國公卒贈侍中贊接士大夫以禮馭下有方略吏民畏服亦賢帥也

王明字如晦大名成安人周廣順初劉崇寇晉州命藥元福將兵禦之事多諮於明先是州縣吏部送丁壯餉糧多遁去元福怒盡驅官吏出軍門將就戮明馳往止之曰今軍儲無闕丁夫數萬人文吏懦不能制

斬之何益不如寬以待之賊敗凱旋公無專殺之名
不亦善乎元福感悟悉免其死既而崇衆宵遁即命
元福鎮晉州奏署明為書記賜緋魚宋開寶中平嶺
南江南功尤著雍熙四年知并州晉秩禮部侍郎卒
張去華字信臣開封襄邑人第進士從太祖征太原以
起居舍人監隨駕左藏庫後以將作少監知晉州景
德中以工部侍郎致仕卒去華嘗獻元元論大旨以
養民務穡為急真宗命以縑素寫其論為十八軸列

置龍圖閣之四壁云

崔遵度字堅白淄川人純介好學太平興國進士為臨汾主簿有惠政部晉州芻糧三抵綏州涉無定河河沙與水混流無定跡陷溺相繼遵度憫之著銘以紀焉端拱初轉運副使夏侯濤上其勤狀召歸擢著作佐郎後為昇王友卒

任中正曹州濟陰人太宗時第進士以監察御史按晉州盛梁獄論如法遷殿中侍御史既有與梁善者

密中之出為荊湖轉運使真宗時以樞密直學士知并州遷給事中累拜樞密副使參知政事降秩卒謚康懿

李垂字舜工聊城人咸平進士修起居注不謁丁謂出累遷知晉州又知絳州明道中召還祇候李康伯言宜謁宰相垂曰我若昔謁丁崖州則乾興初已為翰林學士矣今已老大見大臣不公常欲面折之焉能趨炎附熱看人眉睫以冀推輓乎道之不行命也復

出知均州卒

李若谷祥符間為翼城縣主簿振厲學校貧民有不能嫁娶者捐俸餘以給士民咸愛之

陳希古天禧間由進士以秘書著作郎知翼城縣有文學多所振刷百度修舉邑之風俗一變

劉隨字仲豫開封考城人第進士為右正言坐不察舉人私授策辭累徙通判晉州還朝遷右司諫累疏言丁謂王欽若惡又諫章獻后終天章閣待制隨臨事

明銳敢行人號水晶燈籠

尹洙字師魯河南人第進士調正平縣主簿慶厯中以
右司諫知渭州兼領涇原路經略公事再徙知晉州
遷起居舍人直龍圖閣知潞州會董士廉訟洙詔遣
御史劉湜就鞠不得他罪而以假公使錢貸才將孫
用湜誣洙自貸坐貶崇信軍節度副使卒洙於西事
尤練習為慶厯名臣所至胥有治績而不克盡其用
云

司馬池字和中夏縣人第進士涖政質易不為剽割以
天章閣待制知河中府再徙知晉州卒

李及之字公達濮州人迪弟子也由蔭登第仁宗時知
晉州吏事精明所至稱職致仕卒

孫甫字之翰許州陽翟人初舉進士得同學究出身再
舉進士及第李紘薦其材遷大理寺丞知絳州翼城
縣杜衍辟之後又以直史館知晉州終於侍讀

孫固管城人進士知霍邑縣時相韓琦知其賢諭使來

見固不肯往琦器重之

陳子履由進士以校書郎知翼城縣歐陽修為序送之
政有仁聲

扈周卿大名人嘉祐中為襄陵邑令終日無少怠未半
歲爭訟衰息政恬俗熙每有施設民追思之

孫民先嘉祐初任曲沃縣事勤慎愛民作興學校祀名
宦

向淙以通直郎知翼城縣疎豁明敏政簡刑清興滯補

弊紀律森然吏民畏愛之嘗開東園雖有樂事而闔境謐如稱良吏

劉恕字道源筠州人渙子少穎悟書過目即成誦舉進士講經義擢第一而廷試不中格更試講經復第一遂賜第為和川令發強擿伏一時能吏自以為不及恕為人重意義急然諾郡守得罪被劾屬吏皆連坐恕獨恤其妻子如已骨肉又面數轉運使深文峻詆司馬光編修資治通鑑英宗命擇館閣英才共修之

光對曰專精史學臣得而知者惟劉恕耳即召為局僚遇史事紛錯難治者輒以委之恕卒後七年通鑑成追錄其勞官其子

李察以朝奉郎知翼城縣政平訟簡不喜鉤距時訪民間疾苦惻然軫恤建有阜民廳民皆頌之

呂誨字獻可開封人端孫舉進士治平中為侍御史知雜事以濮議出神宗初徙知晉州加集賢殿修撰知河中府召入累遷御史中丞首論王安石司馬光嘗

勸止之後深服其先見明年誨疾光往省之至則目
已瞑聞光哭聲慟然而起張目強視曰天下事尚可
為君實勉之光曰更有以見屬乎曰無有遂卒海內
痛惜之

李清臣字邦直魏人舉進士為和川令歲滿薦者踰十
數應得京官適舉將薛向有公事未竟闕銓格判銓
張掞擢使自陳勿用清臣曰人以家保已而已捨之
薄矣願待之掞離席曰君能如是未可量也應材識

兼茂科入等元豐六年拜尚書右丞哲宗初轉左丞
出外元祐九年復拜中書侍郎徽宗初再拜門下侍
郎為曾布所陷出外卒清臣起身窮約以儉自持居
官奉法母敢撓以私云

王巖叟字彥霖大名清平人十八舉明經科鄉與省試
廷對皆第一熙寧中監晉州折博煉鹽務元祐中拜
中書舍人滕甫帥太原為走馬承受所撼徙潁昌巖
叟封還詞頭言進退帥臣理宜重慎今以小臣一言

易之使後人畏憚不自保此風寢長非委任安邊之
福乃止六年簽書樞密院事罷為端明殿學士卒

李周字純之馮翊人第進士為洪洞令民有世絕而官
錄其產者其族晚得遺券周取以還之郡吏咎周周
曰利民所以利國也縣南有澗支流溢入歲賦菑捷
調徒遏之周始築新堤民不告病元祐中以集賢院
學士知河中府卒

司馬樸字又季夏縣人育於外祖范純仁調晉寧軍參

軍通判不法轉運使王似調撲伺其過撲曰下使陷
長官不惟亂常人且不食吾餘矣不敢奉教似賢而
薦之靖康初入為右部虞司員外郎

祁昂晉寧統制與徐徽言同被執不屈而死贈成忠郎
團練使父翊宣和末知朔寧府救太原死於陣世著
忠義云

李若水字清卿洺州曲周人上舍登第調平陽府司錄
靖康中以著作佐郎為使見金宗翰於雲中纔歸兵

已南下復假徽猷閣學士往至中年還晉禮部尚書
殉節青城謚忠愍

宗澤字汝霖婺州義烏人第進士調晉州趙城令下車
請升縣為軍書聞不盡如所請澤曰承平時固無慮
他日有警當知吾言矣高宗初除龍圖閣學士言刑
部指揮云不得謗播赦文於河之東西陝之蒲解是
褫天下忠義之氣而自絕其民也臣雖駑怯當躬冒
矢石為諸將先李綱薦知開封府河東巨寇王善擁

衆七十萬車萬乘澤單騎至營招降之又連結河東
山水砦忠義民兵卒贈觀文殿學士謚忠簡

金

張浩字浩然遼陽渤海人天會八年賜進士及第天眷
中為平陽尹平陽多盜臨汾男子夜掠人婦浩捕得
擄殺之盜遂衰息近郊有淫祠郡人頗事之廟祝田
主爭香火之利累年不決浩撤其祠投其像水中強
宗黥吏屏迹莫敢犯者郡中大治乃繕葺堯帝祠作

擊壤遺風亭後封蜀王拜左丞相太師卒謚文康配
享世宗廟庭

劉徽柔字君美大興安次人天眷二年擢進士第為開
遠軍節度掌書記遷洪洞令明敏善聽斷縣人楊遠
者投牒於縣以為夜雨屋壞壓其姪死號訴哀切徽
柔熟視而笑曰汝利姪財而殺之乃誣雨耶叱付獄
其人立伏曰公神明也不敢延死遂寘於法秩滿縣
人遮戀不得去者彌日為立生祠刻石頌德大定二

年同知河東南路轉運使事以廉第一改知平定軍
仕至中都路轉運使卒

丁暉仁字藏用大興府宛平人皇統二年登進士第為
和川令前令罷奕不事事羣小越法干禁無所憚暉
仁申明法禁皆屏息或走入他縣以避之有董祐者
最强悍畏服暉仁以刀斷指誓終身不復犯法凡租
賦與百姓前為期率比他邑先辦大定中同知西京
留守事首興學校以明養士之法卒官陝西西路轉

運使

李晏高平人皇統間厯岳陽令攝隰州蒲縣政立判百餘事衆皆畏服

楊伯雄字希雲正定藁城人皇統二年進士大定時為平陽尹先是張浩治平陽有惠政及伯雄為尹百姓稱之曰前有張後有楊徙河中尹卒謚莊獻伯雄族兄伯淵喜收古書天會十年賜進士第知平定軍用廉遷平州路轉運使致仕卒

楊時翼城人大定間為本縣令篤忠愛戒貪殘教民務
本民德之

胥昂字和之持國子大定二十八年進士入官以能稱
至寧初拜參知政事貞祐二年五月宣宗南遷留為
汾陽軍節度使兼汾州管內觀察使十一月改知平
陽府事兼河東南路兵馬都總管權宣撫使通達吏
事為政鎮靜三年四月建言積軍儲備黃河等十三
事又言郡再被兵人戶散亡樓櫓未完器甲極少廩

庚無兩月食夏田已為兵蹂復不雨秋種未下雖有
復業殘民皆老幼莫能耕種豈足徵求比聞北方劉
伯林聚兵野狐嶺將深入平陽絳解河中遂抵河南
戰禦有期儲積未備不速措置實關社稷生靈大計
乞降空名宣勅一千紫衣師德號度牒三千以補軍
儲詔如數亟給之七月就拜宣撫使兼前職朝廷欲
起代州戍兵五千言嶺外軍已皆南徙代為邊要正
宜益兵保定今更損其力一朝兵至何以待之平陽

以代為藩籬豈宜撤去詔從之又言近聞朝廷定令臣清野臣所部乃河東南路太原則北路也元兵若來必始於北故清野當先北面後南况北路禾稼早熟兵無所掠勢當自止不然南路雖清而穀草委積於北是資兵而名之南也臣已移文北路乞更諭之已而元兵果出境以能設方略退兵進官一階十月言臣所將義軍皆從來背本趨末勇猛凶悍盜竊亡命之徒苟無訓練統攝官以制之則朋聚黨植無所

不至乞許臣便宜置總領義軍使副及彈壓仍每五千人設訓練一員不惟預為防閑使有畏忌且令武藝精熟人各為用上從之四年正月元兵略霍吉隰三州已而步騎六萬圍平陽急攻者十餘日鼎遣兵屢却之且上言臣以便宜立官賞預張文勝招還脅從人七千有奇續至者又六千餘俱令復業竊謂凡被俘未歸者更宜多方招誘已歸者所居從便優加存恤從之二月拜樞密副使權尚書左丞行省於平

陽時河南粟麥不令興販渡河昂言河東多山險平時地利不遺夏秋薦熟猶常藉陝西河南通販物料况今屢值兵戎農民寢少且無雨雪闕食為甚又解州屯兵數多糧儲僅及一月伏見陝州大陽渡河中大慶渡皆邀阻粟麥不令過河臣恐軍民不安或生內患伏望朝廷聽其輸販以紓解州之急從之又言河東兵革之餘疲民稍復然丁牛既少莫能耕稼重以亢旱蝗螟而餽餉所須徵科頗急貧無依者俱已

乏食富戶宿藏亦為盜發蓋絕無而僅有焉其憔悴亦已甚矣有司宜奉朝廷德意以謀安集而潞州帥府遣官於遼沁諸郡搜括餘粟懸重賞誘人告許州縣憚帥府鞭箠械繫所在騷然甚可憐憫今北兵既去惟宜汰冗兵省浮費招集流亡勸督農事彼不是務而使瘡痍之民重罹茲若是兵未來而先自敝也願朝廷亟止之如經費果闕以恩例勸民入粟不猶愈於強括乎又言霍州回牛鳳棲嶺諸阨戍卒幾四

千今兵既去而農事方興乞量留偵候餘悉遣歸有
驚復徵既休民力且息縣官萬一兵來亦足禦遏是
舉一事而獲二利也詔趣行之又言河東兩路農民
寢少而兵戍益多是以每歲糧儲嘗苦不繼竊見潞
州元帥府雖設鬻爵恩例然條目至少進獻無幾宜
增益其條如中都時於是尚書省更定制奏行諸路
焉又言行省行部宜量民力徵斂交鈔河中宣撫司
亦言寶券所支已多民不貴乞驗民貧富徵之然陝

西若一體徵收則彼中所有日湊於河東其與不斂何異又河北寶券以不許行河南繇是愈滯將誤軍儲而啟釁端時寶券限路分行用因昂言罷之又言朝廷命擇義軍為三等臣即檄所司而潞帥必嚕納阿嚕岱請從本府所定無輕變易臣竊是其言時阿嚕岱奏亦至詔遂許之是歲冬元兵越潼關委知平陽府事權元帥左監軍同知府事完顏僧嘉努權右監軍以鎮守河東而率河東南路懷孟諸兵入援拜尚

書右丞及元兵還至平陽鼎遣兵拒戰不利乃去興
定元年議西征又奏臣近遣太原汾嵐官軍以備西
征太原路元帥左監軍烏庠德升甚言其失計臣
愚謂德升所言可取付尚書省議之三年正月元兵
復入陝西令節制河東八月上言臣奉詔兼節制近
晉安帥府令百里之內止留桑棗菓木餘皆伐之方
今秋收乃為此舉以奪其事既不能禦敵而又害民
非計也且一朝警急其所伐木豈能盡去使不資敵

乎他木雖伐桑棗舍屋獨非木乎此殆徒勞臣已下
帥府止之而左都監完顏閭山乃言嘗奉旨清野臣
愚不知其可詔從昂便宜規畫九月元兵徇勝東州
又令領兵赴河中金南渡後書生鎮方面者惟昂一
人宣宗嘗諭委卿河東事果能勉力以保無虞哀宗
亦曰卿徃在河東殘破孤危殆不易保卿一至而定
迄卿移鎮敵不復侵此晉人官晉者之駿勲也仕至
平章政事累封英國公正大元年七月卒於衛州

趙景溫丹陽人泰和間為襄陵令寬於御衆勇於立義
多善政以廉謹著稱

劉仲誠宛平人知大同府尋改平陽府性剛古果於從
善治民有方為一時能吏

李革河津人性穎悟讀書一再誦輒不忘舉進士累官
戶吏二部尚書貞祐中拜參知政事後出知平陽城
被圍屢出戰裨將出降革自殺贈尚書左丞

伊喇阿里哈遼人興定中為霍州刺史元兵至戰敗與

寶昌軍節度副使孔祖湯俱被執不跪向闕立元人
叢矢射殺之祖湯亦不屈死

孫九鼎定襄人明經狀元以尚書員外郎知翼城縣事
時多盜鼎多方勦捕之梟其渠魁餘黨解散

元

王明安燕人太祖時遷守霍州以忠勤擢為平陽總管
元帥奏留鎮守忠恪不移卓有異政

王憚字仲謀衛州汲縣人至元九年授承直郎平陽路

總管府判官太平縣民陳氏殺其兄行賂緩獄蔓引逮繫者三百餘人至五年不決委憚決之一訊即得其實乃盡出逮繫者時絳久旱一夕大雨大德八年卒追封太原郡公

趙世延字子敬居雲中至元二十六年為監察御史按平陽郡監顧森呼圖克賊巨萬甚平允

劉源字巨川翼城人以儒吏兼通充宣慰佐史奏對稱旨授勅牒為西京路經歷至元二十九年遷授將仕

郎本縣尹廉能簡靜有蒲鞭遺風葺學校不勞民力
翕然修舉

劉秉恕字長卿秉忠弟至元間厯官平陽路總管歲荒
民艱食輒開倉以賑之全活者衆卒於官

多爾濟西夏人至元間任襄陵有德政民為立石頌之
按扎爾拓跋氏嘗扈從南征命領蒙古軍為前鋒已卯
河中府降兵北還以按扎爾領前鋒總帥仍統所部
兵屯平陽以備金攝國王事金將赫舍哩擁兵畏按

扎爾威名不敢輕犯其境壬午金將侯小叔陷河中
城元帥石天應死焉將趨中條按扎爾進兵擊之斬
首數萬級免者僅十數癸未春至聞喜縣西下馬村
穆呼哩卒令按扎爾居守平陽甲午封功臣賜平陽
戶六百一十有四驅戶三千獵戶四未幾卒

李伯溫守賢之孫穀之子也行平陽元帥府事鎮青龍
堡及平陽陷弟守忠被執選驍勇拒守久之金人盡
銳來攻守卒多夜遁李成導敵入伯溫登堞樓曰吾

兄弟仗節擁麾受方面之寄今不幸失利當以死報國吾弟已被執我不可再辱汝等宜自逃生士卒尚不忍去伯溫即拔劍殺家屬投井中以刃植柱刺心而死金人登樓見伯溫抱柱如生無不嗟歎

李守正伯溫子為平陽守活俘甚衆以功授河東南路兵馬都元帥庚寅上黨晉陽攻汾州將陷守正赴援敵懼解去汾州持牛酒迎犒者道不絕且泣謝曰幸公完是州德甚大願奉是州以從關中兵屯吉州酋

領楊鐵槍以數千人叛出兵擒之軒成據隰州守正往擊之中矢傷足及歸創甚會金完顏哈達攻平陽守正裹瘡戰沒大帥以其兄守忠代之

李守忠守正兄官至河東南路兵馬都元帥兼知平陽府事壬午冬平陽公胡景山以青龍堡來降丁亥夏四月援國王按扎爾於洪洞會高梁師潰城遂陷金人執守忠至汴誘以高爵守忠罵之惡金人怒置鐵籠中火炙死

伊遜岱爾東原人大德間知洪洞縣能以文學潤飾吏治

楊佑之大德年任翼城縣主簿精敏有幹略勸農興學後鄉舉賈之美李邦獻等立碑記之

杜英延祐間任曲沃重學育士敬神恤民

郝信臣至順間任太平捐俸濟民有惠政碑存焉

冉大年至順間任靈石勤於政事案無留牘暇則巡行郊陌勸課農桑民甚德之昂建孔子廟於靜昇村今

翹像俱存

閻得中至正間任曲沃首建社稷壇鼎新文廟惠愛黔黎作興人材民歌之曰泮宮之崇以扶儒宗社稷之封以祈年豐肇之者誰令尹之功

瑪蘓庫必以華容縣達嚕噶齊調翼城豪邁以經濟自任公退杜門一無所交雖家人亦不敢以私事溷嘗值客兵雲合恣侵掠即闔城門集丁壯禁戢驕橫秋毫無犯百姓德之後受代北歸邑人驚相謂曰公何

來遲而去速也爭挽留不已為立碑頌之

楊宜翼城人時元孫任本縣尹縣之東山有炭窟穿斷
歲久患崩圯宜親視其地創為開置以便民南川水
利灌田甚廣民爭訟不已宜斷理得其平治三十餘
年政廉明善謀斷無少玷闕

實勅必敬昇至正十五年以黎城主簿監翼禮士愛民建
社學免其徭役

葉企顏上蔡人至正十九年以統軍元帥行翼城縣尹

事撫慰軍民行伍無庚癸之呼編戶絕追呼之擾遠
近懷服有遺愛焉

楊文選河南人至正間鎮守靈石公廉慈惠士民愛之
為立頌德碑


阿勒坦布哈伊山人至正間薦授岳陽縣達魯噶齊恤刑
薄賦招集流亡惟恐一民失所有政績碑

王元禮至正初任翼城尹開誠心布公道獎善良疾姦
慝興學校有古循吏風

呼圖克特穆爾字伸威蒙古館陶人至正中任翼城達魯噶齊政舉民服嘗值春旱躬詣卧龍祠禱雨輒應民

立感應碑

莊欽祖趙城尹禦虜患崇文教政績甚異



山西通志卷八十九